

明

史

明史卷三百八十

忠義傳

忠義五

何天衢字升宇阿達州人有勇畧土酋普名聲招為頭目使駐三鄉崇禎三年名聲反謀三路出兵會戰昆明遣砲手三百人助天衢令從維摩羅平入天衢慨然曰此大丈夫報國之秋也吾豈為逆賊用哉遂坑殺砲手數十人率衆歸附署維摩州同知李嗣泌開城納之時名聲已陷彌勒聞天衢反正大懼急撤兩路兵歸不敢深入巡撫王伉上其事授為守備後數與嗣泌有頻有功及名聲死其事始代領其

衆恨天衢屢攻之天衢亦屢挫其衆九年四月錄坊
進叅將自是構兵不休天衢終不為下戰多獲勝十
三年正月擢副總兵時萬氏已贄沙定洲為壻益以
南安兵力勢益強乃厚賄黔國公幕下用事令毀天
衢於是天衢請兵請餉皆不應其勢日蹙賊悉力攻
之天衢食盡舉家自焚死同時揚于陞劔州人舉於
鄉歷官武定府同知好文學創書屋三間于署左召
士子講習名聲之亂巡撫命監紀軍事進討兵敗被
執死之詔贈太僕少卿建祠曰精忠

趙燁字黃如河津人崇禎七年進士授戶部主事兩

督倉儲能祛奸蠹歷兵部郎中出為霸州兵備副使
勤於其職十五年十一月

大清兵入畿輔輝即偕知州丁師羲在籍叅政李時
莒等為城守計踰月被圍督士民嬰城固拒而援軍
不至城遂破輝整冠帶自盡季子琬同時殉難贈光
祿寺卿師羲英雄人由選貢生來為知州圍既合拒
守甚力亦慷慨盡節贈布政使叅議時莒由進士歷
吏部郎中遷分守常鎮右叅政罷官里居與輝等同
被難贈太常寺卿

顏孚紹字賡明曲阜人崇禎四年進士除鳳陽知縣

調繁江都著能聲十年行取入都先是考選優者為
基諫次部曹次府佐至是得為翰林奔競益甚其品
題悉同鄉臺諫主之吏科給事中陳啟新由武生入
素不為儕輩所齒于是有同鄉預擬翰林之疏帝即
令指名以孕紹及涇縣知縣尹民興歸善知縣陸自
岳對帝怒謫三人于外孕紹尋由邯鄲知縣遷真定
府同知守城勦寇並有功十五年擢河間知府時比
歲大饑死亡載道寇盜充斥孕紹周咨民隱拊循甚
至閏十一月大兵臨城與叅議趙珉同知姚汝明知
縣陳三接等憑城堅守時援軍雲集率逗遛不敢進

孕紹知城必破預集一家老穉於室中積薪統之而
身往城上策戰守及城破趨歸官舍命舉火焚室肅
衣冠北向再拜躍入火中同死琬慈谿人崇禎元年
進士歷知南安侯官二縣累遷河間兵備僉事一門
十有四人悉被難汝明夏縣人天啓元年舉于鄉性
篤孝友崇禎間歲大歉傾廩賑濟立義塚募人拾暴
骸給粟瘞埋為蠹絲知縣歲亦大歉疫癘盛作為寬
徭賦施藥煮糜給糶掩骼民歌頌之且勦捕劇盜懲
奸勸善盜多復為良民聞鄉邑又饑貽書其子令振
捄如初里人益懷德後官河間與孕結同殉難妾任

氏從之三接文水人舉崇禎六年鄉試知河間縣歲旱饑人相食三接至雨即降為設賑貸令民藝晚禾給以種有疑獄數年不決三接立決之諸不便于民者聞之必去妻武氏素有賢行三接見封疆多故遣之歸荅曰夫死忠妻死節分也我安忍去至是三接巷戰死于鋒刃武氏亦從死琿贈太僕寺卿孕紹光祿寺卿汝明三接並按察僉事有周而淳者掖縣人初拜兵科給事中即與同官六人分督畿輔諸郡城守事而淳甫至河間城即被圍竟與諸臣同死贈太常少卿

吉孔嘉洋縣人幼時愬父寃于巡方御史迄獲釋時
以孝稱舉崇禎三年鄉試授寧津知縣精明慈惠蠲
煩苛除寇賊閭邑頌德遷順德府同知以才調真定
尋擢順德知府十五年冬

大清兵臨城孔嘉悉力捍禦竟以勢力不敵城失守
與妻張氏長子貢生惠迪次子婦王氏並死焉贈太
僕少卿妻子皆獲旌同時有守城被難者王端冕唐
鉉高維岱數人端冕字服先江陵人由乙榜為趙州
知州居官以廉惠得民城破被執使之降不從縛諸
樹射殺之教諭陳廣心元城人起家乙榜城將被衣

寇危坐以待諸子環泣請避厲聲曰吾平生所學何
事豈為兒女子戀戀耶兵至飲水而沒訓導王一統
成安人居家多義行及是遭難死於明倫堂鉉字節
玉睢州人崇禎七年進士歷定州知州不屈死維岱
昌邑人舉於鄉為永清知縣視事甫旬餘即遇變維
岱一門死之典史李時正教諭邱養性鄉紳劉維蕙
同死清豐破教諭曹一貞訓導董調元亦死焉鉉贈
布政司右叅議維岱按察使僉事餘贈恤有差是時
大兵所至前無堅城巡撫楊進駐真定總兵官姜瓖
駐保定但閉門自守未嘗一戰而總督趙光祚范志

完又專捍東偏不能西顧致畿輔數千里間南至大名西至廣平順德東南至河間喪失名城至十數而長吏死封疆者寥寥厥後論罪反輕于十三年失事五案論者訊之

傅梅刑臺人萬曆十九年舉于鄉三十五年除登封知縣修學校繕城隍發奸祛蠹善政具舉公餘撰尚史十三篇士林稱善入為刑部主事四十三年張差梃擊獄起諸司官胡士相勞永嘉等納鄭國泰重賄將以瘋癲蔽獄梅憤夜詣同官陸夢龍曰人情佐奸而甘心儲皇吾雖恤刑山右當極口論列君與我共

事乎時侍郎張問達署部事夢龍曰張公遇我厚未嘗力爭而遽上疏若張公何當更言之明日夢龍梅見問達反覆申前意問達乃令二人會士相等再鞠及差供至擊皇太子相即推案起獄竟不具梅益憤已問達納夢龍言再令十三司會鞠衆皆集梅後至衆問我部遠有兩議君當如何梅曰奸人欲害皇太子安得持兩議果有兩當立一標曰為皇太子者左為賊者右諸公將左耶右耶復有言當慎重者主事王德坤面發赤厲聲曰何慎奸人欲害儲皇乃不敢語問耶何慎旣鞠差逆謀盡露獄始成比差棄市

梅慮其潛易躬請其監刑自是為群小所疾尋以京
察奪其官天啟初御史焦源溥訟于朝起陝西布政
使都事都御史馮從吾推引之入為戶部主事六年
春御史魯應瑞劾其置身從吾遂削籍崇禎中起故
官歷台州知府解職歸十五年冬畿輔戒嚴梅捐貲
二千募兵置器與順德知府吉孔嘉共為捍衛備中
書舍人孟魯鉢張鳳鳴亦出貲佐之及城被圍諸人
拒甚力已而城破皆死之十七年三月贈梅太常少
卿孟鉢工部營繕主事同時縉紳里居死難者清豐
則吏部郎中李其紀黃州府推官侶鶴舉富陽知縣

杜斗愚南樂則監正鄭獻書河間則襄陽知縣賈太
初永年則山東副使申為憲其紀太初為憲皆進士
斗愚舉人獻書監生

邢國璽長葛人崇禎七年進士授濰縣知縣改建石
城盡心民事時莊烈帝以修城郭練兵民儲糗糧備
戎器四事課天下有司他有司率視為具文惟國璽
奉行如詔上官交薦入為戶部主事時運道為寇盜
所梗有議開膠萊河者國璽久官萊州上疏力言其
便廷中採其言用為登萊兵備僉事經度河道十五
年畿輔戒嚴部檄徵山東兵入衛國璽監督以行至

龍岡猝遇大兵部下驚懼欲竄國璽叱止之身先士卒鏖戰矢必交加墮馬死久之撫按不奏帝降旨嚴責乃具聞贈恤如制當是時大軍南下山東鋒銳甚所至勢如破竹城郭悉止者不可勝數遂抵海州賴榆沐陽迄于豐沛列城將吏解以一矢加遺者或棄城潛遁或獻金帛迎降其身死封疆者止馮守禮張日新張予卿朱迥添任萬民文昌時李旣吳良能吳汝宗周啓元劉光先十一人守禮猗氏人早有志操舉于鄉為縣令所重有疑獄令語訴者得馮孝廉一刺獄即解其人懷金以告拒不聽為平定州學正有

兄弟爭產相訐餽以金字禮嚴却之而開示以友悌
遂息爭去父服除起茗州學正遷知萊蕪至是與二
子搃竒拱竒並自殺日新浙江建德人由歲貢生為
宿松訓導齊東教諭見海內寇起時與諸生講藝習
射土寇安守夏倡亂招降之及齊東被圍與守夏登
陴共禦未幾城陷日新及子光裔死之妻方聞之即
自刎守夏亦從死子嚶知陽信以城破殉難迺添者
瀋陽宗室也居潞安由宗學貢生為鄒平知縣城失
守全節以終萬民陽曲人為諸生見鄉郡被寇草救
時八議守城二十策獻之當塗果得其用以保舉授

城武知縣在職三年有能聲至是力不敵殉城而死
昌時全州人舉於鄉為臨淄知縣以廉慎得民城受
圍與訓導申周輔共守城破昌時舉家自焚周輔亦
被難取大興人崇禎十三年進士知壽光自縊于城
上良能遼東蓋州人舉順天鄉試知滕縣有武畧悍
禦山寇邑賴以安及是城將破盡殺其家屬拜母而
出力戰死汝宗寧洋人知東阿力屈城失守死之啟
元黃岡人舉于鄉知高苑縣城破朱衣坐堂上不屈
死光先知豐縣有二千騎營西城外不攻夜一人自
營逸出語城上人曰彼得梯而攻不信又有逸者曰

梯成立攻矣又婦人自營出曰彼盡甲矣即至也味
其突攻西南陬城中力禦之忽梯登西北陬光先死
焉

張振秀臨清人萬曆三十八年進士授肥鄉知縣以
才調永平入為兵部主事泰昌元年改吏部更歷四
司至文選員外郎乞假歸崇禎改元起驗封郎中歷
考功文選二司時魏忠賢已殛清奸黨登賢良振秀
有力焉擢太常少卿督四澤館三年坐事落職歸十
五年閏十一月

大清兵圍河間遠近震恐臨清為南北重地時以總

兵官劉源清守之聞驚即偕振秀及推閔主事陳興
言州同知路如瀛在籍兵部侍郎張宗衡員外郎邢
恭吉前臨汾知縣尹任等為守禦備未幾城被圍力
拒數日外援不至十有二日城破振秀等並死之判
官徐應芳吏目陳翔龍亦被難如瀛陵川人應芳臨
川人翔龍蕭山人恭吉任並起家進士宗衡自有傳
源清澤清弟贈榮祿大夫太子少保齊魯多仕宦而
城破殉難者絕少惟壽張王大年曹州楚煙滕縣劉
弘緒以盡節聞大年舉進士歷御史加太僕少卿以
附魏忠賢名掛逆案至是不屈死煙舉進士歷龍谿

贊皇二縣遷戶部主事辭職歸及城失守抗拒被殺
子鳳苞以身翼父亦被殺妻趙氏聞知觸柱死弘緒
亦由進士歷洛陽知縣車駕郎中遇變死他若德州
太學生謝陞益都太僕卿馮可賓皆先是逸去為言
官論列議者羞之

鄧藩錫字晉伯金壇人崇禎七年進士歷知龍岩嶽
二縣遷南京兵部主事十五年出為兗州知府時中
州地殘破已盡充與接壤土寇蜂起益以饑饉人不
聊生藩錫聞命知勢難圖全區處公務但以一妾一
婢子以行甫抵任已聞大兵入塞亟練丁壯除戎器

繕完守具纔數旬四萬騎已入城下走告魯王曰吏
有郡國有王猶城舟也聞城之失守皆由貴家惜金
錢耽晏樂而用寡人餓夫列陣捍禦遂致憤事夫城
郭者我之命也財賄者人之命也我不能畀彼以命
而望彼畀我以命乎王誠能散積儲以鼓士氣城猶
可存不然大事一去悔無及矣王不能從藩錫與監
軍叅議王維新同知譚絲曾文蔚通判閻昂推官李
昌期滋陽知縣郝芳聲副將丁文明王府長史俞起
蛟及在籍給事中范叔泰等分門死守藩錫出私財
犒士令縋城出擊頗有殺傷至十二月八日外圍益

急城中力不支乘城者皆潰城破惟新猶力戰矢刃
交加身被二十一創乃死藩錫受縛欲降之不從走
解以死妾聞携穉子投井死魯王以派亦遇害昌期
永年人芳聲忻州人並起家進士昌期嘗監軍破土
寇萬衆人推其才芳聲治縣有聲至是與絲等同死
有樊吉人者元城人由進士知滋陽以才擢兵部主
事再擢山東兵備僉事未行遇變自刎死起錢塘
人由貢生歷官魯府左長史相憲王及惠王立欲易
世子起較力諫乃已世子嗣位值歲凶勸王賑貸自
出粟二千石佐之火盜李青山率衆來犯偕淑泰督

兵出擊大破其衆至是王被難起蛟率親屬二十三
人殉之淑泰自有傳文明亦戰死事聞贈維新光祿
卿藩錫太僕少卿昌期按察司僉事餘贈恤有差

陳美字在中新建人崇禎時由鄉舉為常山知縣以
母憂歸十一年服闋起官宣城承兵燹之餘民生凋
瘵及張獻忠據穀城人情益懼美綢繆安輯脩著勞
績十四年二月獻忠陷襄陽遣兵來犯美設伏要害
偕守備劉相國迎擊之賊至伏發敗衄去巡按御史
上其功獲叙錄撫治都御史王永祚以六等課所部
有司美居上上力荐于朝未及擢用明年冬李自成

連陷洛陽南陽汝寧遂長驅犯襄陽左良玉望風先
奔永祚亦棄城遁知府以下俱遁賊以十二月四日
入城惟前羅平知府蔡思繩福州府通判宋大勛里
居殉節賊分兵寇宜城棗陽穀城光化均州美固拒
八晝夜力屈被陷抗罵不已為賊支解訓導陽城田
世福亦死之棗陽知縣郭裕清江人十四年春由乙
榜授任甫視事獻忠即來犯時左良玉屯近邑裕單
騎邀與共禦賊却去至是賊將劉福來攻裕誓衆登
陴發砲石擊斃死無筭賊憤攻益力以十六年元旦
登城裕身被數槩大罵亦為賊支解闔門皆遇害光

化知縣萬敬宗南昌人起家貢生受任破壞之後以死自誓及賊薄城遂自盡賊義之為引退城中人獲全鄉荐紳韓應龍由乙榜歷官長蘆鹽運使以不受偽職自縊死賊陷穀城知縣周建中亦死焉陷均州知州胡承熙被執不屈與其子爾吳亦死焉承熙治州有能聲永祚以六等課屬吏列之上上遷刑部員外郎未行而遇難賊既陷襄陽遂分兵犯鄖陽之保康知縣萬惟壇死之妻李氏與全死惟壇曹縣人起家由恩貢生

譔吉臣字仲貞南昌縣人父應華舉武會試歷官叅

將以援朝鮮戰沒吉臣由乙榜崇禎中為雲夢知縣拊循凋殘稍有起色十五年十二月李自成陷襄陽其黨賀一龍即以十二日陷德安安陸知縣分水濮有容一門十九人皆死吉臣聞亟遣孥歸而身效死勿去明年正月城陷被執不食者累日賊臨以兵乞速死賊壯之欲授以官不屈賊驅之上馬曰我失守封疆當死于此更安往賊乃殺之袁啓觀者雲夢諸生也賊據城啓觀立寨自守怨家告賊賊執之去出題試之叱曰誰與爾談文賊怒啓觀曰汝既知文亦知亂臣賊子人人得而誅之耶賊即殺之同時程道

壽孝感人常為來安知縣解職歸至是賊陷孝感置
掌旅守之而去道壽結里中壯士擊殺之無何賊至
問誰殺吾掌旅道壽直前自承賊杖之繫獄道壽大
罵賊怒遂見殺諸生廖應元安陸縣人也城既陷鄉
民皆結寨自保賊將白旺連破數十寨應元益堅守
為奸人執送旺旺問汝欲何為厲聲曰欲殺賊爾賊
怒射殺之應山舉人劉申錫家饒于貲養死士百人
至是城陷倡義圖恢復兵敗為白旺所殺百人皆戰
死

盧學古夏縣人舉於鄉授衡水知縣遷承天府同知

攝荆門州事崇禎十五年十二月李自成既陷襄陽
遂寇荆門學古誓衆死守學正黃州張郊芳訓導黃
岡程之奇亦盟諸生於大成殿佐學古城守賊環攻
四日竟無援者城遂陷學古罵賊不絕口剖腹而死
郊芳之奇亦不屈見害有朱士完者潛江舉人賊破
承天長驅陷潛江士完被執械送襄陽道由泗港嘴
指血書已盡節處遂自經又有彭大翻者景陵之青
山人有學行賊逼承天大翻出所著平賊權畧上之
當塗不能用遂自集一旅保障鄉曲賊往來其地大
翻率衆邀擊斬獲過當賊怒于兩夜襲之大翻赴水

而死

撤君錫字賓王絳縣人為諸生有聲崇禎中為荊州府訓導十五年十二月李自成既陷襄陽遂陷夷陵荆門向荊州湖南巡撫陳睿謨聞驚急渡江入城奉瑞王常澗南奔監司以下皆奔士民遂以十八日開門迎賊君錫正衣冠端坐明倫堂賊至欲屈之詔誓而死賊大索縉紳故相張居正子允修以父任當為尚寶丞遭削奪莊烈帝復之至是年已八十被賊執賦絕命詩不食死前戶部員外郎李友蘭不屈死諸生王維藩率妻朱氏及二女避難為賊所掠維藩令

妻女赴井死遂見殺王圖南亦避難被執抗罵而死
夷陵李雲由鄉舉歷武功知縣潁川知州州人祠祀
之謝事歸城陷不屈執至江陵絕食旬日卒呂調元
者歸州千戶也賊陷城士民悉歸附調元獨率部卒
鬪格陷重圍中招之降罵不絕口死於亂刃之下
陳萬策李開先俱江陵人天啓中兩人先後舉於鄉
有時名崇禎十六年正月李自成據襄陽設偽官其
吏政府侍郎石首喻上猷先為御史降賊賊信任之
乃荐兩人賢可重用自成即遣使其書幣徵之萬策
隱龍灣市去城百餘里賊使至嘆曰我為名所悞既

不能奮身滅賊尚可惜此項踵哉夜自經死使者至
開先家開先瞋目大罵以頸觸墻死

蕭漢字雲濤南豐人崇禎十年進士授鍾祥知縣鋤
惡許奸不徇請謁值寇氛熾增城堞建閨廟儲軍食
緩征徭政務修舉十五年冬將入覲聞襄陽陷慨然
曰士見危授命吾可便文自營乎請于上官罷行十
二月賊薄城漢即奠辭家廟授悅于妾媵曰男死忠
女死節分也吾不能死城中萬姓敢愛此一門戚屬
乎撰甲乘城佐巡撫宋一鶴等拒擊賊死傷甚多明
年元旦漢突圍奔謁猷陵賊騎環之漢大呼鍾祥令

在此若等不得震驚陵寢賊挾之去漢延頸就刃賊
不殺遣使說降漢拒之不聽賊送之吉祥寺令僧謹
視漢覓死其不可得于僧搨得一剃刀乃書揚繼盛
絕命詞于敝楮拾土塊畫鍾祥縣令蕭漢願死此寺
十字于壁間即引刀自剄血正濺于字上時正月初
五日也賊嘉其義用錦衣斂而瘞之賊退其門人曰
吾師肯服賊之服乎悉易之贈大理寺丞漢被執之
次日承天即陷巡撫一鶴死之巡按御史李振聲被
賊執去知府王璣亦不屈死璣扶風人舉於鄉由戶
部郎中來任時已擢鳳陽兵備副使未行遇害鍾祥

人從所向舉於鄉歷玉山知縣刑部主事性恬淡解職歸以文史自娛至是與子士默皆不屈死振聲米脂人舉崇禎七年進士授郟城知縣禦寇有功擢御史出巡湖北既被執李自成以全姓全邑稱之為无且贈以金幣振聲不為屈賊數置酒邀飲醉即厲詞詆叱賊乃移之襄陽令部將劉体統伺察之及孫傳庭出關討賊賊復移之于裕州有言振聲通書傳庭者賊怒遣其將谷永殺之南門外振聲東向拜天子北向拜其親乃就刑時九月二十有九日也先是振聲被執有傳其降賊者朝野皆詆之後賊入山西榜

列投職者姓名并列振聲故相賀逢聖以誣惑遠近
然二人實未嘗受職也有張鳳翥者宿松人由進士
歷官兵備副使分巡承天城將陷奪圍出擊中三办
累疾走募勇敢圖恢復竟以創重卒

許文歧字我西仁和人祖子良巡撫貴州右僉都御
史父聯樞廣西右叅政文歧登崇禎七年進士授南
京兵部武庫主事進員外郎改職方郎中時賊大擾
江北佐尚書范景文拮据戎備景文甚倚之十年出
為黃州知府地數被寇為製火器嚴斥墥募丁壯守
備甚設賊嘗一犯境遣將禦之射殺其前鋒一隻虎

奪大轟而還獄有重囚七人令歸省尅期就獄皆如
約至乃請於上官而貸之十三年遷下江防道副使
駐蘄州時賊魁賀一龍蘭養成等盡萃蘄黃間監軍
推官楊卓然承揚嗣昌命招撫反受其侮文岐設備
益嚴賊黨張雄飛將潛兵南渡命游擊楊富馳田家
鎮焚其舟賊乃引却巡撫宋一鶴上其功副將張一
龍馭兵嚴文岐共之常共宿帳中中夜呼譟聲四起
文岐曰此必奸人乘夜思適耳堅卧不出質明叛兵
百餘果奪門遯一龍率兵追獲盡斬之一軍肅然揚
富既久鎮蘄一鶴復遣叅將毛顯文至不相得兵民

洵洵文歧會二將以杯酒釋之始無患十五年荆襄
失守左良玉潰兵南下長江數千里民居商艘焚掠
畧盡文歧立馬江口迎之兵莫敢犯時警報日急人
無固志會擢督糧叅政客曰公今可行矣文歧嘆曰
吾為天子守孤城三載矣分當死封疆雖危急奈何
棄之遺妻奉母歸檄揚富毛顯文出屯關廟為固守
計無何荆王府將校郝承忠潛通張獻忠遂以明年
大舉兵來攻文歧率甲士往來捍禦發神銳斃賊甚
衆夜將半天寒雪盈尺賊破西門入文歧猶督軍巷
戰雪愈甚砲不得發遂被執獻忠聞其名頗禮之文

岐厲聲曰既被執惟速死耳獻忠不殺繫之後營時
舉人奚昂鈞等數十人同繫文岐密謂曰觀賊老營
多烏合凡此數萬皆被掠良民若告以大義同心協
力賊可殲也於是陰相結期四月中起事以柳圍為
信謀洩獻中索之果得柳圍縛文岐斬之將死語人
曰吾所以不死者志圖滅賊耳今事不成天也含笑
而死時文岐陷城中已七十餘日矣事聞贈太僕寺
卿賊既陷蘄州遂屠其民前陝西按察僉事李新舉
家被執賊欲屈新叱之曰我昔官秦中爾輩方為廝
養今日肯屈膝廝養耶賊怒新抱父屍就其時屬

吏死難者惟麻城教諭定遠蕭頌聖蘄水訓導施州童天申其他無聞焉

樊維城黃岡人給事中玉衡子也第萬曆四十七年進士除海鹽知縣入爲禮部主事天啓七年坐事謫上林苑典簿其年十一月莊烈帝已嗣位魏忠賢尚未伏誅抗疏言曩曹吉祥之反其黨羽止曹欽一人爾忠賢則子姪列三爵假子過金吾陛下不即誅夷使得徐爲布置其私甲士多至萬人外不隸名於樞部內不屬籍於團營怒馬鮮衣橫行都市倘用其蔽國之財鼓其敢死之士臣恐吉祥之變一旦發於闕

下此不可不亟誅者也。高皇帝定律，人臣非有大功，朦朧奏請封爵者，所司及受封之人，俱處死。魏良卿、良棟、鵬翼、悉白、丁乳臭之兒，而並叨封爵，此不當按律誅之乎？皇親張國紀何罪而勒令還鄉，戚畹李承恩何罪而羅織論死，知府劉鐸何罪而立肆市朝，監司耿如杞、胡士容何罪而並置大辟？昔劉瑾既誅，奮章改正者，吏部二十四事，戶部二十餘事，兵部十八事，工部十三事，今不當倣而行之乎？且忠賢所積之財，半盜自內帑，累朝寶玩盡入其家，誠籍而還之，太府可以裕九邊數歲之餉，寬三農加派之征，此決當

旦夕舉行者因請褻恤楊漣萬燦等一十四人召選
賀逢聖文震孟孫必顯等三十二人亟正張體乾許
顯純楊察等罪其月又言崔呈秀雖雉經私室尚宜
剖棺戮屍明正國法忠賢死賍賄已散其半呈秀死
安知其家不寄之他人此籍沒不可緩也五虎五彪
之徒罪狀顯著何待証佐然後究追恐提勘未行賍
私先隱且田吉吳淳夫田爾耕許顯純孫雲鶴張體
乾高守謙輩皆應斬之人乃或賜馳驛或僅令還鄉
何以服人心昭國典末斥吏科陳爾翼請緝東林遺
孽之非爲御史方震孺請釋罪帝並採納之崇禎元

年遷戶部主事進員外郎歷泉州知府福建八年以
大計罷歸十六年張獻忠連破黃梅麻城廣濟蘄州
蘄水遂以三月犯黃州時城南門哭五日夜衆知禍
必至傾城走婦女多不及行二十四日賊入黃岡知
縣光山孫旬一縣丞 吳文燮死之賊執維城欲
屈之抗聲漫罵賊必洞胸而死賊逐婦女墮城稍緩
輒斫其腕血淋漓土石間三日而城平復殺之以實
塹焉

易道暹字曦侯黃岡諸生也好學尚氣節積書滿家
所居在深山非賊往來道虞寇竊掠約鄉人建堡設倉
爲捍禦計十六年賊漸逼子爲瑚請遠避道暹重惜

其書又以已所著書多不忍棄之遂巡未行及賊益逼爲瑚急奉母走青峯岩道暹不得已令蒼頭擔書携幼子爲璉他適賊遇諸途其導者潛以告賊賊問若何人給以遠方書賈賊笑曰汝易曦侯也何欺我道暹曰若既知我當聽我一言村中財物足資汝飽掠慎毋殺人焚廬舍賊曰若自身不保尚爲他人言耶速從我與汝富貴道暹厲色叱責賊怒殺之爲璉聞急詣賊請代賊又殺之未幾爲瑚亦遇害全時傳可知黃陂諸生幼失怙卧樞下三年六十失恃啜粥

者亦三年里人將舉其孝行固辭道拾遺金坐待其人而還之黃陂陷被執可知年已八十賊憫其老不殺俾之養馬叱曰我爲衣冠數十年今日乃役於賊耶延頸就刃賊即殺之

郭以重黃州人世爲衛指揮十六年城陷自他所來赴難其妻欲止之叱曰朝家界我十三葉金紫不能易一死哉吾將先殺汝妻乃不敢言既至遇賊欲脅之去堅不從賊露刃懾之且誘以富貴乃好謂賊曰從汝非難但抱小兒者吾妻也汝爲我殺之吾無累矣賊如其言以重耶奪賊刀擊斬一賊群賊擁至遂赴水死先是蘄州破指揮岳璧自屋墜地不死賊知

其官也問之不答索弓刀衣服又不答賊怒執至城上欲降之厲聲曰我世臣也城亡與亡豈降賊哉賊必之仆地氣將絕揚目曰我死爲鬼亦當滅汝時大雪血流丈餘目眦不合同時郭金城爲羅田守將賊逼城率所部五百人大戰斬級百餘追之英山賊大集困之三日突圍不得出遂被繫脅降不從乃見殺崔文榮海寧衛人世爲指揮僉事文榮舉武會試以天啓五年嗣職授南安守備崇禎中臨藍盜起逼桂陽桂王告急文榮督所部會勦賊衆至三四萬勢不

敵乃多張旗幟以疑之賊不測虛實退去以功擢武昌叅將十六年張獻忠陷黃州以四月犯漢陽文榮潛師渡江襲擊斬首六百級而還無何漢陽陷武昌震懼時巡撫宋一鶴總兵官錢中選皆死於承天新任巡撫王聚奎未至武昌素不置衆兵城中空虛有議撤江上兵守城者文榮曰守城不如守江團風煤炭鴨蛋諸洲淺不及馬腹縱之飛渡而坐守孤城非策也當事不從五月五日賊果從團風渡江陷武昌縣縣中空無人賊出營樊口文榮軍於洪山寺以扼之既而歛兵入城以他將代守二十三日賊全軍由

鴨蛋州畢渡越三日抵洪山守將亦退入城文榮以武勝門當賊衝偕故相賀逢聖協力堅守賊攻之不能下監軍叅政王揚基時已擢右僉都御史巡撫承天德安二郡未開命尚駐武昌見勢急與推官傅上瑞詭言有事漢陽開門遁去人情益洶洶先是楚王出資募兵應募者率斬黃潰卒及賊間謀至是開文昌保安二門納賊文榮方出關還闔城扉不及躍馬大呼殺三人賊攢槩刺之洞胸而死有朱士昂者起家武進士為巡江都司城陷被執賊喜其勇敢欲大用之士昂戟手大罵賊斷其右手乃以左手染血灑

賊賊天斷之士鼎不死賊退令人縛筆於臂能作楷
字招集舊卒訓練如常廷中聞而旌異之

徐學顏字君復永康人性篤孝友母疾衣不解帶者
三月禱於天請以身代夜夢神人授以藥但識其形
色而廣覓之得荆瀝焉疾遂愈父為中城兵馬指揮
忤要人下吏學顏三疏訟寃所司格不上徧叩諸公
卿莫為申雪將置之重辟學顏號泣爭於刑部不能
得至嚙臂血濺於庭乃獲釋歸弟食指繁推所居大
宅盡畀之尚義疏財為德於族黨甚衆崇禎三年建
東宮詔舉孝友廉潔博物洽聞可勵俗維風者有司

以學顏應寢不行三登鄉試副榜當爲訓導至十二年始以恩貢生特授楚府左長史引義匡輔王甚敬之強宗亦爲飲戢王及闔府將中軍尉上官及武昌士民莫不稱其賢交章論薦未及擢用會十五年冬諸司長官及武昌知府江夏知縣並以朝覲行學顏攝江夏事繕修守備大著勞勩楚府新募兵即令學顏將之明年五月大寇臨城城中惟監司王揚基王瓚二人爲政學顏與之力守無何揚基遁去人心益推至晦日新軍內叛城遂陷學顏猶與格鬪賊斷其左臂大罵不屈爲賊支解一家二十餘人殉之通判

固安李毓英亦舉家自縊一時同死者武昌衛經歷汪文熙巡檢戴良瑄及僧官一人俱誓賊不屈腰斬賊既陷武昌分兵陷其屬邑于是嘉魚知縣霍山王良鑑蒲圻知縣臨川曾拭俱抗節死事聞學顏贈按察僉事毓英等贈恤有差

馮雲路字漸卿黃岡人好學勵行年三十即棄諸生從賀逢聖講學遂寓居武昌閉戶著書凡數百卷崇禎十三年巡撫御史林銘球荐其賢并上所著用書百卷時不能用及寇將渡江貽書逢聖曰在內以寧湖為止水在外以漢江為泊羅寧湖者雲路嘗所談

紹處也城旣陷乘桴入寧湖賊遣使來聘追呼曰我
主以高爵待賢人公何爲遠遁遙應曰我生平止讀
忠孝書未嘗讀降賊書也遂投湖中以死年四十有
六從遊諸生汪延陞亦死焉其同邑熊霽字渭公亦
移居武昌嗜古學尤喜邵子皇極書頗言未來事十
六年元旦盡以所撰性理格言圖書懸象大易叅諸
書付其三弟曰能讀此可以保身立命我生平積力
在焉善藏弗失城破前一日貽書雲路言明日當覓
我於某樹下及期行樹旁賊亦追至躍入荷池以死
有諸生明睿者江夏人城破賊獨不入其門睿慨然

曰安有父母之邦覆而偷生苟活者語象連從我入井否則速去於是妻二子二女及諸婢以次投井屢笑曰吾今曠然無累矣從容榜諸門赴井死時人號爲明井

蔡道憲字元白晉江人崇禎十年進士授大理府推官父服闋起官長沙其地多盜察豪民通盜者推心任之一日盜方劫富家分財奴者已至召富家還所失物皆愕不知所自有群盜閉戶謀劫謀成落戶而捕卒已坐其門爭散去告府宗人多放恣民有腴產輒誣爲蕩庄宅舍佳者夜朱其戶旦迫使徙去厚賄乃已無賴者悉投爲校尉魚肉閭閻有司逮治必請

之王往往匿不發道憲獨先治而後啓王王召責之
抗聲曰民天子之民亦王之民方今四海鼎沸寇盜
日滋王不思保有其民一旦撻而走險能獨與此曹
保富貴乎王悟謝遣之自是奸人斂手十六年五月
晦張獻忠陷武昌長沙大震承天巡撫王揚基率所
部千人自岳州奔長沙道憲請還駐岳州曰岳與長
沙唇齒也并力守岳則長沙可保而衡永亦無虞揚
基曰岳非我屬也道憲曰棄北守南猶不失爲楚地
若南北俱棄亦未見謝過有詞也揚基語塞乃勉赴

岳州及賊入蒲圻卽颺帆遁去湖廣巡撫王聚奎時
遠駐袁州憚賊不敢進道憲亦請移岳州卽以告揚
基者告之聚奎不得已至岳教日卽徙長沙道憲曰
賊去岳尚遠正可繕兵固守彼來犯岳猶憚長沙救
援若棄岳不守長沙能獨全哉聚奎不從賊果以八
月陷岳州直犯長沙先是巡按御史劉熙祚委道憲
募兵道憲得壯士五千訓練之皆精悍可用至是親
將之與總兵官尹先民等扼守羅塘河聚奎聞賊逼
怯甚令道憲等撤兵還守城道憲曰去長沙六十里
有險道可柵以守毋使賊得踰此又不從及賊陷城

聚奎說言出戰遽率所部遁走惠王先以避難寓長沙與吉王謀出奔會徧沅巡撫李乾德總兵官孔希貴自岳州潰敗至遂與熙祚奉二王走衡州時知府堵銜錫入覲未返通判周二南往攝攸縣事城中文武寥寥士民盡竄道憲猶勒兵拒守賊遠城呼曰軍中久知蔡推官名可遂降毋自苦道憲命守卒射之多斃賊怒攻益力越三日先民出戰敗還賊乘勢奪門入先民遂降道憲被執時八月二十有二日也賊說道憲啗以官嚙齒大罵賊釋其縛欲延上座罵如故賊使先民說之道憲益怒奮起摔擊賊以道憲

愛民謂汝不降將盡殺百姓道憲大哭曰願速殺我
毋累他人賊知終不可奪命磔之氣垂絕猶作恨聲
賊問何恨曰恨不殺尹先民爾其心血直濺賊面賊
為昏仆者久之有健卒林國俊等九人追隨不去賊
令說道憲降國俊曰如吾主畏死早隨諸人去矣不
至今日賊曰爾主不降爾輩亦不得活國俊曰如我
輩畏死亦早隨諸人去矣不至今日賊并殺之內四
奮卒曰願埋主屍而後死賊許之乃解衣裹道憲骸
瘞之南郊醴陵坡遂自刎道憲死時年止二十九後
贈太僕少卿謚忠烈堵徭錫為建祠醴陵坡上二南

字汝為雲南人由選貢生為長沙通判盡心職事與道憲深相得道憲之死二南方請於上官乃獲恤久之擢岳州知府士民固留乃以新秩還長沙後亦死于王事並祀于道憲祠

馮一第長沙人天啓末舉於鄉以詩文名湖湘間崇禎十六年八月賊陷長沙一第出走湘鄉將乞師他方圖恢復賊帥聞繫其母无以招之一第慮母无被禍歸長沙就縛賊將斬之一老僧伏地哭請免賊乃去其兩手置之營中一夕死母及无獲免鄉人賢之附祀蔡道憲祠全時唐德明東安人崇禎九年舉於

鄉未仕遇城陷賊所置僞官索之急德明仰藥死謝
如珂耒陽諸生賊犯其境如珂與鄉人拒敵力戰死
張綸祁陽人舉崇禎三年鄉試方介寡合恒高戶下
帷不入城市遭寇亂避地深山築土室以居親故罕
亦見其面竟卒於土室

張鵬翼西充人崇禎中由選貢生授衡陽知縣十六
年八月張獻忠逼衡州巡撫王聚奎李乾德及監司
以下皆遁士民亦盡室奔鵬翼獨守空城賊至即陷
脅使降不從戰髯詬罵賊怒縛而投諸江妻子亦赴
水死賊之赴岳州也巴陵教諭桂陽歐陽顯字時攝

縣事死焉其陷臨湘也知縣蒲田林不息抗罵不屈
斫其兩手而後殺之湘陰之陷知縣大埔楊開率家
屬十七人投水死其丞賴萬耀攝醴陵縣事城破亦
死之宜興莫可及者長沙府照磨也攝寧鄉縣事殉
城而死二子若昂若鈺號極奔赴亦遇害衡州既陷
屬縣衡山亦失守知縣富順董我前教諭分宜彭允
中並盡節死賊既陷長沙衡州遂陷常德同知鶴慶
朱國治正冠帶而死府教授永明蔣道亨攝武陵縣
事抱印罵賊死其他文武將吏非降則逃鮮能死節
者長沙史可鏡由進士歷官工科給事中丁艱歸至

是降賊賊用為湖南巡撫及賊退為官軍所獲李乾德加擄掠械送南都伏法鄉人羞稱之

劉熙祚字仲緝武進人父純仁進士泉州府推官熙祚舉天啓四年鄉試崇禎中為興寧知縣地產斷腸草啖之輒死奸民常藉以費人財物熙祚下令贖罪者必以草以是致死者弗問其弊為止課最微授御史十五年春極論安慶巡撫鄭二陽庸劣債事及廬州副使蔡如蘅貪淫罪帝納之是冬巡按湖南時李自成已陷荆襄諸郡張獻忠又破蘄黃臨江欲渡熙祚嘆曰門庭既失堂奧必危倘不能保障湖南還之

天子何賴立于世明年二月抵岳州調諸將分防江
潁檄偏沅鄖陽二撫聯絡形勢會賊馬守應據澧州
窺常德土寇甘明陽等助之勢張甚熙祚馳至常德遣
將先擊土寇明陽投首五月還長沙及武昌岳州相
繼陷以羅塘河地居要害令大將尹先民副將何一
德督萬人守之無何巡撫王聚奎撤守長沙賊無所
憚遂長驅而至聚奎大怖即率潰將孔全彬黃朝宣
張先璧等棄長沙走湘潭沿途焚劫熙祚以長沙不
能守奉吉惠二王奔衡州聚奎兵亦至焚劫如初衡
為桂王所封地王及吉惠二王亦登舟避之熙祚與

僚屬言未嘗不慟哭痛恨於聚奎也然謂其擁兵可
藉以守乃于九月四日匹馬赴永州為城守計未幾
聚奎復棄衡州走祁陽衡州遂陷永州士民聞之空
城而逃十六日二王至永州明日聚奎繼至其隸卒
猶責屈吏賄又明日全彬等兵亦至盡劫庫金而去
熙祚乃奉二王出城遣部將護走廣西而已返永州
拒守俄賊騎追至被執送至衡州見獻忠獻忠時踞
桂王宮叱令跪不屈命群毆之傷目自殿城曳至端
禮門膚盡裂使降將尹先民說之終不變乃見殺贈
太常少卿謚忠毅弟永祚字叔遠由選貢生授嶽縣

知縣勸村循教教化刑政清簡胥徒多去而歸農遷
養利知州蠻人亦服其化改興化府同知許擒劇賊
曾旺為巡撫所獎攝仙遊縣事有靖寇功後以副使
知興化府事

大兵入城仰藥死弟綿祚字季延崇禎四年進士為
安吉丞豐知縣鄰近有九蓮山界連閩粵賊窟其中
久為民患綿祚屢請兵會勦賊怒率衆來攻綿祚督
兵出擊三戰三捷賊益兵大至綿祚伏兵黃牛峒誘
賊來戰復大破之縣境乃安然以積勞得疾請告歸
乃卒兄弟三人並死國事論者多之王聚奎既失丞

州後伺賊退潛還武昌為新任巡撫何騰蛟所劾將罪之以夤緣獲免

王孫蘭字晚仲無錫人崇禎四年進士授刑部主事進員外郎出為成都知府蜀府宗人及奄豎好魚肉細民民不堪一日忽聚衆為變將焚內江王第舍孫蘭亟出撫諭即解散尋以父憂歸服闋起官紹興歲比告凶孫蘭大修荒政闔郡頽之十五年遷廣東按察副使分巡南雄韶州二府甫蒞任連州獍賊為亂馳赴湟川進勦三戰皆捷遂降明年張獻忠大亂湖南湖南之郴州宜章與韶接壤人情恟懼孫蘭嚴

飭守備連乞援于督府不應及賊陷長沙衡州大肆屠戮韶所轄樂昌乳源仁化諸邑逋竄一空連州守將先據城納款韶城士民聞之亦空城而逃孫蘭乃仰天嘆曰事不可為矣吾益先死乎遂自縊時十月二十有二日也孫蘭既死賊竟不至朝廷憫其忠命予贈恤又有程良籌者孝感人舉天啓五年進士時父註為太常少卿被御史王士英劾罷去并良籌除名崇禎元年起官行人擢吏部稽勳主事歷文選員外郎掌選事時麻城李長庚為尚書良籌以全鄉附之甚為所倚初掌選時為誓神文播之都下其後不

如所言朝論頗少之七年八月長庚用推舉失當削
籍良籌亦下吏罪坐遣戍久之釋歸十六年李自成
陷德安承天旁迤州縣悉空城而逃孝威亦陷良籌
以邑中白雲山險峻可守與同里紳衿築壘結寨聚
衆自保賊以地當要隘設長圍攻之相持月餘不下
乃解去時漢陽武昌亦為張獻忠所陷四面皆賊而
白雲孤處其間勢危甚會武昌為官軍所復良籌亦
號召遠近諸寨犄角進兵良籌故書生所部又皆鄉
民不任戰其冬十二月進薄德安遂敗退保白蓮寨
寨中人素通賊為內應良籌遂被執羈之密室中明

年正月左良玉遣將攻德安賊懼棄城去遂殺良等
贈太常少卿父誼任至南工部尚書南都失守誼遁
歸後數年終于家